

文

通

文通卷之七

明黃岡朱荃宰咸一著

貢

敘治

此叙
祖事之

正義曰禹貢一篇主非君言準之後代不應入書此
其一體之異以此禹之身事於禪後無入夏書之理
禹貢敘治水以冀兗青徐楊荆豫梁雍爲次嘗考之
地理豫居九州中與兗徐接境何爲自徐之楊顧以
豫爲後乎蓋禹順五行而治之耳冀爲帝都旣在所
先而地居北方實于五行爲水水生木木東方也故

次之以充青徐。木生火。火南方也。故次之以揚荆火。生土。土中央也。故次之以豫。土生金。金西方也。故後於梁雍。所謂彛倫攸敘者。此也。與鯀之汨陳五行相去遠矣。

鄭夾漈曰。州縣之設。有時而更。山川之形。萬古不易。所以禹貢分州。不以山川定經界。使兗州可移。而濟河之兗不能移。梁州可遷。而華陽黑水之梁州不能遷。是故禹貢爲萬世不易之書。後之爲史者。主於州縣易移。而其書遂廢。

自水經而後其體絕矣

黃省曾曰。自九丘不傳。四獄埋縕。周官存藪。浸之略。爾雅開崑崙之端。若司馬遷之載河渠。庾仲雍之筆江記。偏係一方。匪兼八表。况王澤寢消。地象俱廢。樂廣闢者。湮其溝洫。便私謀者。壅其湍泉。公家醞激。巨右改張。是以啓塞靡恒。陵谷皆變。洪鉅者失其包帶。微纖者亂其營緯。紕訕訕莫之質竟也。已。故漢之桑欽。追法貢體。錄爲水經。羅併四際。總勒一典。凡所引天下之水。百三十有七。苟非經流。不在記註之限。錯陳舊纂。以備叅鈎。派盡條科。以罄脉衍。務討異奇。

同蔚宗之旨趣。嚴標郡縣。肖班固之鋪設。乃曠絕之
觚翰也。然規綱則舉。解節未彰。迨於後魏。酈道元。因
景純之濫觴。足君長之簡逸。以博洽之弘襟。擅圖輿
之顓學。隨經抒述。掇籍弘鋪。剖說十倍於前文。揮述
半陟其躬履。或衆援以明訛。或極辨而較是。或哀述
以昭邇。或廓無而續有。故凡過歷之臯維。夾並之抵
岍。環間之亭郵。跨俯之城陸。鎮被之巘嶺。廻注之溪
谷。瀕枕之鄉聚。聳映之臺館。建樹之碑碣。沈淪之基
落。靡不芴萃曲收。左摭右采。豈曰桑欽之詁釋。實所

以粉飾漏闕銓次疆隅乃相濟而爲編者也省曾又覽古山海經十八卷亦宇中之通撰也一則主於叙山而水歸詳綴一則專於紀水而山頗寓列蓋山者水之根底水者山之委枝故談伊洛者必連熊外語漆沮者遂及荆岐亦自然之偶屬而不可判離者也故併合以傳庶好古之賢無粹輯之煩勤爾客謂二經所記於今矛盾矣其將捨旃可乎予解之曰子何榆枋之安而螻蛄之拘也其伯益之覽䟽猶之災農之辨味也桑扈之括纂猶之姒禹之苦成也今卉藥

非簠簋之稽案。咸賦豈驕華之志掌。亦將擯本草以
詭誕。斥禹貢之遠闊可乎。况山殊稱目。而盤峙之形
不眩焉。水異分合。而就下之情不惑焉。粵邇往牒。則
遠方圖物。夏鼎之鑄象也。聿耳雕題。湯令之備獻也。
白民黑齒。成王之作會也。出受八千。管仲之蒐揚也。
殘遺秦柱。蕭何之顯布也。獵廣窮長。王克之嗜信也。
以至孔䟽據之以釋經。漢志錄之而麗史。齊澄演之
而聚書。唐典繫之而建部。守節屢登於正義。應麟富
載於地鈔。江淹補之而不能。吉甫刪之而頓蹟。古人

崇好文獻足徵苟欲指核希怪狀寫物靈暢探荒極
理驗遷圯裁量利害差剖離翕鑒度率吟宅定中外
作起民緒咨訊帝采則二經者亦寰內不刊之珍典
也

範

嘗讀洪範見武王之所訪箕子之所陳俱在彝倫攸敘然疇雖有九而其旨要則惟水火金木土五者而已矣何也彝倫攸斁而帝不畀鯀以洪範九疇者以其汨陳五行也天以洪範九疇錫禹而初一日五行則五行謂非九疇之大綱乎雖于初獨不言用下文八者俱以用言非五行獨無用也蓋以下文所云用者皆用此五行也九疇只此五行夫固所以陰陽下民而爲治天下之大經大法所謂彝倫之攸敘敘此

焉耳。是故惟五居中，不以數言五事，五紀庶徵，五福則皆五也。政雖八也，食貨祀賓師統於三官，而八政非五歟？德雖三也，正直一而剛柔之克，各二三德非五歟？稽疑雖七也，卜兆五而其占則用二稽疑非五歟？至六極則皆五福之反也。但五行在天地間，凡萬事萬物莫非自然之運用，而用之者則各有攸當耳。所以敬用五事，卽五行之本諸身而罔弗欽也。農用八政，卽五行之施諸民而農爲先也。協用五紀，卽五行之合乎天而罔敢悖也。建用皇極，卽五行之一於

中而端表則也。又用三德卽五行之矯其偏而從乎正也。明用稽疑卽五行之各兆而慎所擇也。念用庶徵卽五行之各有徵而可自省也。嚮用五福威用六極卽五行之禍福在人所自取也。可見皇極居中固有以握乎九疇之樞。五行在初實有以統乎九疇之用。是五行不言用而天下萬世大經大法雖欲越此以爲用焉不可得矣。况箕子之所陳者乃千古聖學之傳。故建極在上會歸在民。王道蕩蕩平平本人人所當率由而天人貫通之理亦人人所當會歸焉者。

循此則藝倫敘。悖此則藝倫斁矣。可不慎哉。至以此
揆之洛書。戴九履一。左三右七。二四爲肩。六八爲足。
而五居中。于義本無所取。但其所同者五行也。一六
水。二七火。三八木。四九金。五十土。是水火木金土在
洛書謂之九數。而天地萬物之數。管是矣。在洪範謂
之九疇。而天地萬物之用。管是矣。諸儒不知五行乃
洛書洪範自然乎起之妙。必欲以疇強合於數焉。何
哉。且洛書自一至九。其奇耦方位各有定在。洪範自
初一至次九。不過九疇之綱耳。果何以見其初一五

行三八政之類皆爲奇次二五事四五紀之類皆爲偶初一五行方位當在下次九五福六極方位當在上八政當在左五紀當在右洛書之數九而洪範何爲于初一卽曰五行次二乃曰五事次三乃曰八政其數皆雜亂而不循其奇偶方位之敘也雖曰天乃錫禹洪範九疇原未指爲洛龜何爲卽以洪範之九疇配洛書之九數以其言列其位且衍之八十一章焉果洛書也果洪範也止因其同一九字而必欲一同之又何怪其愈傳而愈訛耶况禹旣因洛書以

敘疇矣。或謂先天卦取則洛書，又有謂後天卦取則九疇。果天已錫之伏羲，復錫之于禹，果伏羲已先禹而爲之書，禹乃後伏羲而爲之疇，果禹先文王而敘之爲九，文王後禹而列之爲八，果禹先箕子而爲之範，箕子後禹而衍其說耶？諸說紛紛，皆劉歆之說誤之也。要之道一而已矣。得其意則殊塗而同歸，否則道本一而見則二，惡足以窺聖人之學。

鄭樵曰：洪範之數有九，而初一日五行，五行之序一曰水，且鯀之所治者水也。天何以知其汨陳五行而

不畀洪範九疇禹之所治者水也天何以遽錫之洪
範九疇藝倫攸敘而不曰五行之何如蓋九疇之綱
領在於五行五行之綱領在於水請以禹貢明之禹
之治水自冀州始冀爲帝都在北方屬水故冀在先
冀州之水旣治水生木水屬東方故次兗次青次徐
皆東方也袁青徐之水旣治木生火火屬南方故次
楊次荊皆南方也楊荊之水旣治火生土土屬中央
故次豫豫居天下之中也豫州之水旣治土生金金
屬西方故終之以梁雍焉今以天下之勢觀之豫立

天下之中與徐兗接境自兗徐旣治之後何不先次豫而必先次揚次荆何也蓋禹順五行相生之序如此觀禹治水之先後五行已得其序則九疇可知故天錫之者以此鯀之治水不依五行次第故箕子於鯀湮洪水之下先占一句汨陳五行五行汨陳則九疇可知天之不畀以此可見禹貢洪範之書相爲用者或曰九疇之五行一曰水二曰火三曰木四曰金五曰土非水木火土金也曰九疇乃天地生成之數天一生水地六成之地二生火天七成之此乃五行

相生之數。生成之數。其體也。相生之數。其用也。體用兼備。此禹所以善用五行也。正如大易言天地之數五十五。至於用則爲五十。虛一爲大衍以揲蓍也。

武王始入殷。訪于箕子。受洪範。踐阼三日。召士大夫而問焉。曰。惡有藏之約。行之得。可以爲子孫恒者乎。諸大夫對曰。未得聞也。召師尚父而問焉。曰。黃帝顓頊之道存乎。意亦忽不可得見與。師尚父曰。在丹書。王欲聞之。則齊矣。齊三日。王端冕出。師尚父亦端冕奉書入。負屏而立。王下堂北面立。師尚父曰。先王之

道不北面。至西行折而南。東面而立。師尚父西面。道書之言曰。敬勝怠者吉。怠勝敬者滅。義勝慾者從。慾勝義者凶。凡事不强則枉。弗敬則不正。枉者滅。廢敬者萬世王。聞書之言。惕若恐懼。於席四端。於杌。於鑑。於盥盤。於楹。於杖。於帶。於履屨。於豆觴。於戶牖。於劒。弓矛。皆爲銘儆焉。

象

王弼曰。象者出意者也。言者明象者也。盡意莫若象。盡象莫若言。言主于象。故可尋。言以觀象。象主於意。故可尋。象以觀意。意以象盡。象以言著。故言者所以明象。得象而忘言。象者所以存意。得意而忘象。猶蹄者所以在兔。得兔而忘蹄。筌者所以在魚。得魚而忘筌也。然則言者象之蹄也。象者意之筌也。是故存言者非得象者也。存象者非得意者也。象生於意。而存象焉。則所存者乃非其象。言生於象。而存言焉。則所

存者乃非其言。然則忘象者。乃得意者也。忘言者。乃得象者也。得意在忘象。得象在忘言。故立象以盡意。而象可忘也。重畫以盡情。而畫可忘也。是故觸類可爲其象。合義可爲其徵。義苟在健。何必馬乎。類苟在順。何必牛乎。爻苟合順。何必坤乃爲牛。義苟應健。何必乾乃爲馬。而或者定馬於乾。案文責卦。有馬無乾。則僞說滋蔓。難可紀矣。互體不足。遂及卦變。變又不足。推致五行。一失其原。巧愈彌甚。縱復或值。而義無所取。蓋存象忘意之由也。忘象以求其意。義斯見矣。

彖

王弼曰。彖者何也。統論一卦之體。明其所由之主者也。夫衆不能治衆。治衆者至寡者也。夫動不能制動。制天下之動者。貞夫一者也。故衆之所以得咸存者。主必致一也。動之所以得咸運者。原必無二也。物无妄然。必由其理。統之有宗。會之有元。故繁而不亂。衆而不惑。故六爻相錯。可舉一以明也。剛柔相乘。可立主以定也。是故雜物撰德。辯是與非。則非其中爻莫之備矣。故自統而尋之物。雖衆則知可以執一御也。

著法
二陽
一陰
則從
陰二
陰二
陽則
從陽
以此

由本以觀之。義雖博。則知可以一名舉也。故處璇璣以觀大運。則天地之道未足怪也。據會要以觀方來。則六合輻輳。未足多也。故舉卦之名義有主矣。觀其彖辭。則思過半矣。夫古今雖殊。軍國異容。中之爲用。故未可遠也。品制萬變。宗主存焉。彖之所尚。斯爲盛矣。夫少者多之所貴也。寡者衆之所宗也。一卦五陽而一陰。則一陰爲之主矣。五陰而一陽。則一陽爲之主矣。夫陰之所求者陽也。陽之所求者陰也。陽苟一焉。五陰何得不同而歸之。陰苟隻焉。五陽何得不同

而從之。故陰爻雖賤而爲一卦之主者。處其至少之地也。或有遺爻而舉二體者。卦體不由乎爻也。繁而不憂。亂變而不憂。惑約以存。博簡以濟。衆其唯彖乎。亂而不能惑。變而不能渝。非天下之至賾。其孰能與於此。故觀彖以斯義可見矣。

曆

世本曰容成作曆

尚書曰廼命羲和欽若昊天曆象日月星辰敬授民時又曰協用五紀其五曰曆數

陳同父曰昔者聖人之作曆也觀璇璣之運三光之行道之發斂景之長短斗綱之建青龍所躔參伍以變錯綜其數而制術焉天之動也一晝一夜而運過周星從天而西日違天而東日之所行與運周在天成度在曆成日居以列宿終於四七受以甲乙終於

六旬日月相推日舒月速當其同謂之合朔舒先速
後近一遠三謂之弦相與爲衡分天之中謂之望以
速及舒光盡體伏謂之晦晦朔合離斗建移辰謂之
日月之行則有冬有夏冬夏之間則有春有秋故日
行北陸謂之冬西陸謂之春南陸謂之夏東陸謂之
秋日道發南去極彌遠其景彌長遠長乃極冬乃至
焉日道斂北去極彌近其景彌短近短乃極夏乃至
焉二至之中道齊景正春秋分焉日周於天一寒一
暑四時備成萬物畢改攝提遷次青龍移辰謂之歲

字婁

歲首至也。月首朔也。至朔同日。謂之章。同在日首。謂之部。部中六旬。謂之紀。歲朔又復。謂之元。是故。日以實之。月以閏之。時以分之。歲以周之。章以明之。部以部之。紀以記之。元以原之。然後雖有變化。萬殊羸訥。無方。莫不結系于此。而稟正焉。極建其中。道管于外。璇衡追日。以察斂光。道生焉。孔壺爲漏。浮箭爲刻。下漏數刻。以考中星。昏明生焉。日有九道。月有九行。九行出入而交生焉。朔會望衡。鄰於所交。虧薄生焉。月有晦朔。星有合見。月有弦望。星有畱逆。其歸一也。步

術生焉、金水承陽、先後日下、速則先日、遲而後留、留而後逆、逆與日違、違而後速、與日兢兢、又先日遲速順逆、晨夕生焉、日月五緯、各有終原、而七元生焉、見伏有日、留行有度、而率數生焉、參差齊之、多少均之、會終生焉、引而伸之、觸而長之、探賾索隱、鉤深致遠、無幽辟潛伏、而不以其精者然、故陰陽有分、寒暑有節、天地貞觀、日月貞明、若夫祐術開業、淳耀天光、重黎其上也、承聖帝之命、若昊天典曆、象三辰以授民事、立閏定時、以成歲功、義和其隆也、取象金火、革命

創制治曆明時、應天順民、湯武其盛也、及王德之衰也、無道之君、亂之於上、頑愚之史、失之於下、夏后之時、羲和淫泆、廢時亂日、胤乃征之、紂作淫虐、喪其甲子、武王誅之、夫能貞而明之者、其興也勃焉、回而敗之者、亡也忽焉、魏魏乎若道天地之綱紀、帝王之壯事、是以聖人寶焉、君子勒之、夫曆有聖人之德六焉、以本氣者尚其體、以綜數者尚其文、以考類者尚其象、以作事者尚其時、以占往者尚其源、以知來者尚其流、大業載之、吉凶生焉、是以君子將有興焉、咨焉

而以從事。受命而莫之違也。若夫用天因地。揆時施教。頒諸明堂。以爲民極者。莫大乎月令。帝王之大司備矣。天下之能事畢矣。過此而往。羣忌苟禁。君子未之或知也。斗之二十一度。去極至遠也。日在焉而冬至。羣物於是乎生。故律首黃鐘。曆始冬至。月先建子。時平夜半。當漢高皇帝受命四十有五歲。陽在上章。陰在執除。冬十有一月甲子夜半朔旦冬至。日月閏積之數。皆自此始。

李本寧曰。陶通明讀書萬卷。一事不知。以爲深恥。余

往在史館、四明相國、嘗拉余從其里人司天者學、余謝未能久之、官大梁、會日食時、不相應、衆莫解也、安肅邢士登僉憲大梁時、上書言國家大統曆、本元郭守敬授時曆、頃者日食刻分不合、兩至失子半之交、率間一日、宜亟改氣、應轉交以合天行、明興用夏變夷、何得以勝國至元辛巳爲曆元、守敬嘗稱諸應等數不用爲元正、欲後人隨時改革耳、故十七年作曆、至三十一年而三應、業有加減、隆慶間、監臣周相議年遠數盈、天度漸差、失今不考、所差必甚、大宗伯隲

其言請召士登爲京朝官主欽天監事中涓懼溺其
職不果行余甚壯其人思誦其書不可得會行邊過
鄜延執士登手相勞如平生得所爲古今律曆考卒
業焉言天周歲周之差上下消長之法古曆未備而
獨授時爲詳密其測日景地凡二十七所別創簡儀
仰儀方案窺几圭表景符諸儀參伍錯綜能盡其變
今大統椿實之數與朔實交轉未推測改正且初造
曆不言所測景何地。去極若干。與授時合否。沿襲舊
文布之天下刻舟求劍膠柱鼓瑟甚無當也其考春

秋日食必於月朔曾無一爽僖公五年辛亥朔旦冬至元史謂辛亥與天合則可謂正月朔旦與天合則不可五年十有七年兩日食史失加時晝夜二十一年九月十月二十四年七月八月兩書日食則春秋史官以失閏故補足一閏兩策俱存而修史者并收之必無比食之理其失出記載之誤者五或出置閏之差者六尚書月令昏旦中星今古不同謂六十六年差一度非定法也邵子皇極經世差法度越諸子然而一朞三百六十五日有奇而但曰三百六十六

日氣盈朔虛各五日有奇共十二日有奇而但曰退六日進六日共十二日一閏再閏各有日下不及全分之分秒而但曰二十六日六十日俱就成數約言之寧無疑誤後學諸如此類真喟然動眾其要指曆以日月爲主務先明於氣朔而五星之行一視日度爲準日度正斯五緯正歲差不明日度未改則五緯之步安所適從將有以玄枵爲星紀甲子爲乙丑者舛不甚乎按之古俟之今仰占象緯俯察璣衡如數一二如合符節豈夫碣石談天作恠迂之變傲人以

所不知欺人以所不習乎哉士登又言律與曆相通而律不可以爲曆名律曆考者存故實耳諸史志天文志五行各爲一家非曆則莫得原委所游秦晉中州必測日景復買舟走吳越測東南西北景同異忘寐達旦其少時喜數學九章算術疊疊不舍貌爲省瘦凡數十年而考始就固宜精絕若是胡元入主中華天地變易士恥食其祿而一代曆法前無古人宇宙大矣顧令絕地通天之儒產于被髮左衽之朝乎國家文明盛治天所篤祐有異人如士登者貫三才

括萬象羅百家彌縫郭氏之闕而匡救其所不及扶
千古未盡之秘成千古未備之典洗千古未雪之憾
當吾世而見其人與書是千古未有之遭也

何燕泉曰漢律曆志曰三代既沒五伯之末史官喪
紀疇人子弟分散或在夷狄夷狄之有曆亦自中國
而流者也然東夷北狄南蠻皆不聞有曆而西域獨
有之蓋西域諸國當崑崙之陽於諸夷中爲得風氣
之正故多異人若天竺梵學婆羅門伎術皆西域出
也自隋唐以來已見於中國今世所謂回回曆者相

西域
象緯
之學
絕不

傳爲西域馬可之地年號阿剌必時異人馬哈麻之
所作也。以今考之其元實起於隋開皇十九年己未
之歲其法嘗以三百五十五日爲一歲歲有十二宮
宮有閏日凡百二十有八年閏三十有一日又以三
百五十四日爲一周周有十二月月有閏日凡三十
年閏十有一日歷千九百四十一年而宮月甲子再
會其白羊宮第一日日月五星之行與中國春正定
氣日之宿直同其用以推步分經緯之度著陵犯之
占曆家以爲最密元之季世其曆始東逮我

高皇帝之造大統曆也。得西人之精乎曆者。於是命欽天監以其曆與中國曆相參推步。迄今用之。今按歲之爲義於文。從步。從戌。謂推步從戌起也。白羊宮於辰在戌。豈推步自戌時見星爲始故與。

御製文集有授翰林編修馬沙亦黑馬哈麻敕文。謂大將入胡都。得秘藏之書數十百冊。乃乾方先聖之書。我中國無解其文者。聞爾道學本宗。深通其理。命譯之。今數月測天之道甚是精詳。時洪武壬戌十二月也。二人在翰林凡十餘年。

大明
辭

田藝衡曰。大明者。國號也。一人爲大。日月爲明。天大
地大人大。而宇宙人物。如日月之明。無所不照也。
大統曆者。取春秋大一統之義。以明曆也。統者系也。
總理也。綱紀也。撫御也。曆者象也。曆象日月星辰是
也。數也。天之曆數在爾躬是也。通作曆。過也。傳也。

本紀

史通曰昔汲冢竹書是曰紀年呂氏春秋肇立紀號蓋紀者綱紀庶品網羅萬物篇目之大者其莫過于此乎及司馬遷之著史記也又列天子行事以本紀名篇後世因之守而勿失譬夫行夏時之正朔服孔門之教義者雖地遷陵谷時變質文而此道常行終莫之能易也然遷之以天子爲本紀諸侯爲世家斯誠謹矣但區域既定而疆理不分遂令後之學者罕詳其義按姬自后稷至于西伯嬴自伯翳至於莊王

秦失
其鹿
亦有
攸分

爵乃諸侯而名隸本紀。若以西伯莊王以上別作周秦世家。持殷紂以對武王。拔秦繆以承周赧。使帝王傳授昭然有別。豈不善乎。必以西伯以前其事簡約別加一目。不足成篇。則伯翳之至莊王其書先成一卷而不共世家等列。輒與本紀同編。此尤可恠也。項羽僭盜而死。未得成君。求之于古。則齊無知衛州吁之類也。安得諱其名字。呼之曰王者乎。春秋吳楚僭擬書于列國。假使羽竊帝王。正可抑同羣盜。况其名曰西楚。號止霸王者乎。霸王者。卽當時諸侯。諸侯而

稱本紀求名責實再三乖繆蓋紀之爲體猶春秋之經繫日月以成歲時書君上以顯國統曹武雖曰人臣實同王者以未登帝位國不建元陳志權假漢年編作魏紀亦猶兩漢書首列秦莽之正朔也後來作者宜准於斯而陸機晉書列紀三祖直序其事竟不編年年既不編何紀之有夫位終北面一槩人臣儻追加大號止入傳阼是以弘嗣其史不紀孫和緬求故實非無往例逮伯起之次魏乃編景穆於本紀以戾國虛謚開厠武昭欲使百世之中若爲魚貫又紀

者既以編年爲主。惟叙天子一人。有大事可書者。則見之于年月。其書事委曲。付之列傳。此其義也。如近代述者。魏著作李安平之徒。其撰魏齊二史。于諸帝篇。或雜載臣下。或兼言他事。巨細畢書。洪纖備錄。全爲傳體。有異紀文。迷而不悟。無乃太甚。世之讀者。幸爲詳焉。

世家

史通曰自有王者便置諸侯列以五等疏爲萬國周之東遷王室大壞於是禮樂征伐自諸侯出迄乎秦世分爲七雄司馬遷之記諸國也其編次之體與本紀不殊蓋欲抑彼諸侯異乎天子故假以他稱名爲世家其爲義也豈不以開國承家世代相續至於陳勝起自羣盜稱王六月而死子孫不嗣社稷靡聞無世可傳無家可宅而以世家爲稱豈當然乎夫史之篇目皆遷所創豈以自我作古而名實無準且諸侯

大夫家國本別。三晉之與田氏。自未爲君而前。齒列陪臣。屈身藩后。而前後一統。俱歸世家。使君臣相雜。升降失序。何以責季孫之八佾舞庭。管氏之三歸反坫。又列號東帝。抗衡西秦。地方千里。高視六國。而沒其本號。惟以田完制名。求之人情。孰謂其可。當漢氏之有天下也。其諸侯與古不同。夫古者諸侯皆卽位。建元。專制一國。綿綿瓜瓞。卜世長久。至於漢代。則不然。其宗子稱王者。皆受制京邑。自同州郡。異姓封侯者。必從官天朝。不臨方域。或傳國惟止一身。或襲爵

才經數世。雖名班爵胙土。而禮異人君。必編爲世家。實同列傳。而馬遷強加別錄。以類相從。雖得畫一之宜。詎識隨時之義。蓋班漢知其若是。釐革前非。至如蕭曹茅土之封。荆楚葭莩之屬。並一槩稱傳。無復世家。事勢當然。非矯枉也。自茲已降。年將四百。及魏有中夏。而楊益不賓。終亦受屈。中朝見稱僞主。爲史者必題之以紀。則上通帝王。榜之以傳。則下同臣妾。梁主勅撰通史。定爲吳蜀世家。持彼僭君。比諸列國。去太去甚。其得折中之規乎。次有子顯齊書。北編魏虜。

牛弘周史南紀蕭管考其傳體宜曰世家但今古著
書通無此稱用使馬遷之冊湮沒不行班固之名相
傳靡易者矣

列傳

史通曰夫紀傳之興肇于史漢蓋紀者編年也傳者
列事也編年者曆帝王之歲月猶春秋之經列事者
錄人臣之行狀猶春秋之傳春秋則傳以解經史漢
則傳以釋紀尋茲例草創始自子長而朴略猶存區
分未盡如項王立傳而以本紀爲名非惟羽之僭盜
不可同於天子且推其序皆作傳言求謂之紀不可
得也或曰遷紀不可得也或曰遷紀五帝夏殷亦皆
列事而已子曾不之怪何獨尤於項紀哉對曰不然

亦略
不同

夫五帝之與殷夏也正朔相承子孫遞及雖無年可著紀亦何傷如項羽者事起秦餘身終漢始殊夏氏之后羿似皇帝之蚩尤譬諸閏位容可列紀方之駢拇難以成編且夏殷之紀不引他事夷齊諫周實當紂日而析爲列傳不入殷篇項紀則上下同載君臣交雜紀名傳體所以成姓夫傳紀之不同猶詩賦之有別而後來繼作亦多所未詳按范曄漢書紀后妃六宮其實傳也而謂之爲紀陳壽國志載孫劉二帝其實紀也而呼之曰傳考數家之所作其達紀傳之

情乎。苟上智猶且若斯，則中庸故可知矣。又傳之爲體，大抵相同，而述者多方，有時而異耳。如二人行事，首尾相隨，則有一傳兼書，包括令盡。若陳餘、張耳合體成篇，陳勝、吳廣相叅並錄，是也。亦有事跡雖寡，名行可崇，寄在他篇，爲其標冠。若商山四皓，事列王陽之首；廬江毛義，名在劉平之上，是也。自茲已後，史氏相承，述作雖多，斯道多廢，其同于古者，惟有附出耳已。尋附出之爲義，攀列傳以垂名，若紀季之入齊，顓臾之事魯，皆附庸自託，得廁于朋流。然世之求名者，

咸以附出爲小蓋以其因人成事不足稱多故也竊以書名竹素豈限詳略但問其事竟如何耳借如邵平紀信沮授陳容或運一異謀樹一奇節並能傳之不朽人到如今稱之豈假編名作傳然後播其遺烈也嗟乎自班馬以來獲書于國史者多矣其間則有生無令聞死無遺跡用使遊談者靡徵其事講習者罕記其名而虛班史傳妄占篇目若斯人者可勝紀哉古人以沒而不朽爲難蓋爲此也

劉勰曰原夫載籍之作也必貫乎百氏被之千載表

作史之難

徵盛矣。殷鑒興廢，使一代之制，共日月而長存。王霸之跡，並天地而久大。是以在漢之初，史職爲盛。郡國文計，先集太史之府，欲其詳悉於體國。必閱石室，啟金匱，抽裂帛，檢殘竹，欲其博練於稽古也。是立義選言，宜依經以樹則，勸戒與奪，必附聖以居宗。然後銓評昭整，苛濫不足矣。然紀傳爲式，編年綴事，文非泛論，按實而書。歲遠則同異難密，事積則起訖易疎。斯固總會之爲難也。或有同歸一事而數人分功，兩紀則失於複重，偏舉則病於不周。此又銓配之未易也。

長源
路史
正復
至此

文選卷之七
故張衡摘史班之舛濫傳玄說後漢之尤煩皆此類也若夫追述遠代代遠多僞公羊高作春秋傳云傳聞異辭荀况稱錄遠略近蓋文疑則闕貴信史也然俗皆愛奇莫顧實理傳聞而欲偉其事錄遠而欲詳其跡於是棄同卽異穿鑿傍說舊史所無我書則傳此訛濫之本源而述遠之巨蠹也至於記編同時者夫時同多詭雖定衰微辭而世情利害勲榮之家雖庸夫而盡飾迎敗之士雖令德而常嗤理欲二字吹霜噴露寒暑筆端此又同時之狂可歎息者也故述

遠則誣矯如彼。記近則回邪如此。析理居正。惟素臣
乎。若乃尊賢隱諱。固尼父之聖旨。蓋纖瑕不能玷瑾
瑜也。奸慝懲戒。實良史之直筆。農夫見莠。其必鋤也。
若斯之科。亦萬代一準焉。至于尋繁領雜之術。務信
棄奇之要。明白頭訖之敘。品酌事例之條。曉其大綱。
則衆理可貫。然史之爲任。乃彌綸一代。負海內之責。
而羸是非之尤也。秉筆荷擔。莫此之勞。遷固通矣。而
歷譏後世。若任情失正文。其殆哉。

此論
補史
傳者

補注

史通曰。昔詩書既成。而毛孔立傳。傳之時義。以訓詁
爲主。亦猶春秋之傳。配經而行也。降及中古。始名傳
曰注。蓋傳者轉也。轉授於無窮。注者流也。流通而靡
絕。惟此二名。其歸一揆。如韓戴服鄭。鑽仰六經。裴李
應晉。訓解三史。開導後學。發明先義。古今傳授。是曰
儒宗。旣而史傳小書。人物雜記。若贅虞之三輔決錄。
陳壽之李漢輔臣。周處之陽羨土風。常據之華陽士
女。文言美辭。列於章句。委曲叙事。存於細書。此之注

釋異夫儒士者矣。次有好事之子思廣異聞而才短
力微不能自達。庶憑驥尾千里絕羣。遂乃掇衆史之
異詞補前書之所闕。若裴松之三國志。陸澄劉昭兩
漢書。劉彤晉紀。劉孝標世說之類是也。亦有躬爲史
臣手自刊削。雖志存該博而才闕倫敘。除煩則意有
所恡。畢載則言有所妨。遂乃定彼榛楛列爲子注。若
蕭大圜淮海亂離志。楊銜之洛陽伽藍記。宋孝王關
東風俗傳。王邵齊志之類是也。權其得失求其利害。
少期集注國志以廣承祚所遺而喜聚異同不加刊

定恣其擊難。坐長煩蕪觀其書成表獻。自比蜜蜂。兼採但甘苦不分。難以味同萍實者矣。陸澄所注班史多引司馬遷之書。若乃此缺一言。彼增半句。皆採摘成注。標爲異說。有昏耳目。難以披覽。切惟范曄之刪後漢也。簡而且周。疎而不漏。蓋云備矣。而劉昭採其所捐。以今稱之。皇甫謐全錄斯語。載於高士傳。夫孟堅士安年代懸隔。至今之說。豈可同云。夫班之習馬其非。旣如彼謚之承。固其失又如此。迷而不悟。奚其甚乎。何法盛中興書。劉隗錄稱其議獄事具刑法志。

依檢志內了無其說。既而臧氏晉書梁朝通史於大連之傳並有斯言。志亦無文。傳乃虛述。此又不精之咎。同於玄宴也。尋班馬之列傳皆具編其人姓名如行狀尤相似者。則共歸一稱。若刺客曰者。儒林循吏是也。范曄既移題目於傳首。歷姓名於卷中。而猶於列傳之下注爲列女高隱等目。苟姓名既書。題目又顯。是鄧禹冠恂之首。當署爲公輔者矣。岑彭吳漢之前。當標爲將帥者矣。觸類而長。實繁其徒。何止列女孝子高隱獨行而已。魏收著書。標榜南國。桓劉諸族。

咸曰鳥夷是則自江東西盡爲卉服之地至於劉和

沈文秀等傳敘其爵里則不異諸華劉裕等傳皆云丹徒人也沈文

秀等傳則云吳興武康人豈有君臣共國父子同姓闔閭季札便

致土風之殊孫策虞翻仍成夷夏之隔求諸往例所

未聞也當晉宅江淮實膺正朔嫉彼羣雄稱爲僭盜

故阮氏七錄以田范裴段諸記劉石符姚等書別朔

一名題爲僞史及隋氏受命海內爲家國靡愛憎人

無彼我而世有撰隋書之經籍志者其流別羣書還

同阮錄按國之有僞其來尚矣如杜宇作帝勾踐稱

王孫權建鼎峙之業，蕭公爲附庸之主，而揚雄撰蜀紀子貢著越絕，虞裁江表傳，蔡述後梁史，考斯衆作，咸是僞書，自可類聚相從，合成一部，何止取東晉一世十有六家而已乎？夫王氏將崩，霸國云構，必有忠臣義士捐生殉節，若乃韋耿謀討曹武，欽誕問罪馬文，而魏晉史臣書之曰賊，此乃迫於當世，難以直言，至如荀濟、元瑾、蘭摧於李靖之末，王謙、尉廻、玉折於宇文之季，而季刊齊史，顏述隋篇，時無逼畏，事須矯枉，而皆仍舊不改，謂數君爲叛逆，書事如此，褒貶何

施昔漢代有修奏記於其府者遂盜葛龔所作而進之既具錄宅文不知改易姓名時人謂之曰作奏雖工宜去葛龔及邯鄲氏撰笑林載之以爲口實嗟乎歷觀自古此類尤多其有宜去而不去者豈直葛龔而已何事於斯獨致解頤之誚也凡爲史者苟能識事詳審措辭精密舉一隅以三隅反告諸往而知諸來庶幾可以無大過矣

表曆

年表

人表

劉子玄曰。蓋譜之建名。起于周氏。表之所作。因譜爲形。故桓君山有云。太史公三代世表。旁行斜上。並効周譜。此其證歟。夫以表爲文。用述時事。施彼譜曆。容或可取。載諸史傳。未見其宜。何則。易以六爻窮變化。經以一字成褒貶。傳包五始。詩含六義。故知文尚簡要。語惡煩蕪。何必款曲重沓。方稱周備。覩馬遷史記。則不然矣。天子有本紀。諸侯有世家。公卿已下。有列傳。至于祖孫昭穆。年月職官。各在其篇。具有其說。用

讀者
之非

年表

相考覈居然可知而重列之以表成其煩費豈非謬乎且表次在篇第編諸卷軸得之不爲益失之不爲損用使讀者莫不先看本紀越至世家表在乎其間緘而不視語其無用可勝道哉旣而班東二史各相祖述迷而不悟無異逐狂必曲爲銓擇強加引進則列國年表或可存焉何者當春秋戰國之時天下無主羣雄錯峙各自年世若申之以表以統其時則諸國分年一時盡見如兩漢御曆四海成家公卿旣爲臣子王侯才比郡縣何用表其年數以別于天子也

人表

哉。又有甚於斯者。異哉班氏之人表也。區別九品。網羅千載。論世則異時。語姓則他族。自可方以類聚。物以羣分。使善惡相從。先後爲次。何籍而爲表乎。且其書上自庖犧。下窮嬴氏。不言漢事。而編入漢書。鳩居鵲巢。蔦施松上。附生疣贅。不知剪裁。何斷而爲限。至法盛書載中興。改表爲注。名目雖巧。蕪累亦多。當晉氏播遷。南據揚越。魏宗勃起。北雄燕代。其間諸僞。十有六家。不附正朔。自相君臣。崔鴻著表。頗有甄明。比于史漢羣篇。其要爲切者矣。若諸子小說。編年雜記。

十六
國春
秋

如韋昭洞記陶弘景帝王曆皆因表而作用成其書
既非國史之流故存而不述

楊用脩曰班史古今人表予反復論之其謬有四一
曰識鑒之謬二曰荒略之謬三曰名義之謬四曰妄
作之謬夫傳道者曾子乃列於冉閔仲弓之下蓋不
知曾子不與四科之故也首霸者齊桓乃居於四公
之次蓋不知五霸莫盛於桓文之說也魯隱列於下
下而葛伯反在上中若以讓桓爲行善而未盡彼廢
祀仇餉者惡未極乎嫪毐列於中下而於陵仲子與

之同等。若以好名者誠非中道。彼淫穢叛逆者尚可齒乎。此其識鑒之謬也。夔后夔也。居夔於上下。出后夔於下。上韋豕韋也。寘韋於下。上列豕韋於下。是以一人而二之。郵無卹與王良並著。范武子與士會具垂。是舉名謚而離之。此其荒略之謬也。茲二謬者。古人嘗論之。見於張宴羅泌之書。然猶就有成籍而謫之。爾若其名義妄作之謬。則未有及之者也。予以爲固作漢書紀漢事也。鴻荒以來。非漢家之宇。上古羣佐。非劉氏之臣。乃總古今以著人表。旣已乖其名。

復自亂其體名義謬矣。有仲尼之聖。然後可以裁定前人憲章後世。然而六經之述。必待晚年。固何人也。而高下古今之人乎。依阿人螭。自取天憲。使其自署。當在何等。身陷於重淵之下。而抗論於達霄之上。誰其信哉。昔荀卿論十二子。一時人爾。識者猶或非之。固又豈卿儔哉。謂之妄作可也。大謬若此。而古人之論。曾不及之。豈以爲不足論乎。班史文詞。世所深好。蓋有愛之忘其醜者矣。注家之說曰。六家之論。輕重不同。百行所存。趨舍難一。班所論未易倚撫。陋哉。

書志

夫刑法禮樂風土山川求諸文籍出於三禮及班馬著史別裁書志考其所記多效禮經且記傳之外有所不盡隻事片文於斯備錄語其通博信作者之淵海也原夫司馬遷曰書班固曰志東觀曰記華嶠曰典張勃曰錄何法盛曰說名目雖異體統不殊亦猶楚謂檣杪晉謂之乘魯謂之春秋其義一也於其編次則有前曰平准後云食貨古號河渠今稱溝洫析郊祀爲宗廟分禮樂爲威儀懸象出於天文郡國生

於地理如斯變革不可勝計或名非而物是或小異而大同但作者愛奇恥於仍舊必尋源討本其歸一揆也若乃五行藝文班補子長之闕百官典服謝拾孟堅之遺王隱後來加以瑞異魏收晚進弘以釋老斯則自我作古出乎胸臆求諸歷代不過一二者焉大抵志之爲篇其流十五六家而已其間則有妄入編次虛張部帙而積習已久不悟其非亦有事應可書宜別標題而古來作者曾未覺察云

舉古
今人
表同

雨曜百星麗於玄象非如九州萬國廢置無恒故海
田可變而景緯無易古之天猶今之天也今之天卽
古之天也必欲刊之國史施於何代不可也但史記
包括所及區域綿長故書有天官讀者竟忘其誤班
固因循復以天文作志志無漢事而隸入漢書尋篇
考限觀其乖越者矣降及有晉迄于隋氏或地止一
隅或年才二世而彼蒼列志其篇倍多方於漢史又
孟堅之罪人也切以國史所書宜述當時之事必爲
志而紀天鳥也但載其時彗孛氛祲薄食晦明裨竈

梓慎之所占。京房李邵之所候。至於熒惑退舍。宋公延齡。中台告折。晉相速禍。星集潁川。而賢人聚。月犯少微。而處士亾。如斯之類。志之可也。若乃體分濛濛。色著青蒼。丹曦素魄之躔次。黃道紫宮之分野。旣不預於人事。輒編之於策書。故曰刊之國史。施於何代。不可也。其間唯有袁山松沈約蕭子顯魏收等數家。頗覺其非不遵往例。寸有所長。賢於班馬遠矣。

五行

災祥之作。以表吉凶。麒麟鬪而日月蝕。鯨鯢死而彗

星出河變應於千年山崩由於朽壤又曰太歲在丑
乞漿得酒太歲在巳販妻鬻子則知吉凶遞代如盈
縮循環此乃關諸天道不復繫乎人事且周王決疑
龜焦蓍折宋皇誓衆竿壞幡亾梟止梁師之營鵬集
賈生之舍斯皆妖災著象而福祿來鍾愚智不能知
晦明莫之測也然而古之國史聞異則書未必審其
休咎也故證候相軋有異不爲災見於春秋其事非
一洎漢興考洪範以釋陰陽如江璧傳於鄭客遠應
始皇卧柳植於上林近符宣帝門樞白髮元后之祥

柱樹黃雀新都之識舉夫一二良有可稱。至於蜚蜮
蝮螽震食崩折隕雨霜雹大水無冰其所證明實皆
迂濶。故當春秋之世其在於魯也。如有旱雩外候螟
蟥傷苗之屬。是時或秦人歸祿。或毛伯賜命。或滕邾
入朝。或晉楚來聘。皆持此恒事。應彼咎徵。旻穹垂謫。
厥罰安在。探顧索隱。其可略諸。近者宋氏年唯五紀。
地止江淮。書滿百篇。號爲繁富。猶廣以拾遺。加之語
錄。况春秋記二百四十年。夷夏之國盡書。而經傳集
解。卷才三十。則知其所略。蓋亦多矣。而漢代儒者羅

災眚於二百年外、討符會於三十卷中、安知事有不
應於人、應人而失其事、何得苟有脫變、而必知其地
者哉、若乃採前文而改易其說、謂王札子之作亂在
彼成年、夏徵舒之構逆、當夫昭代、楚嚴作霸、荆國始
僭稱王、高宗諒陰、亳都實生桑穀、晉悼臨國、六卿專
政、以君事臣、魯僖末年、三桓世官、殺嫡立庶、斯皆不
憑章句、直取胸懷、或以前爲後、以虛爲實、移的就筭、
掩耳盜鐘、詎知後生可畏、來者難誣、又品藻羣流、題
目庶類、謂莒大爲國、菽爲強艸、鶩著青色、負蠶匪中

國之虫、鸚鵡爲夷狄之鳥、如斯詭妄、不可殫論、而班固就加纂次、曾靡銓擇、因以五行編而爲志、不亦惑乎。且每有敘一災、推一恠、董京之說、前後相反、向歆之解、父子不同、遂乃雙載其文、兩存要理、言無准句、豈所謂撮其機要、收彼菁華者乎。自漢中興迄于宋齊、其間司馬彪、臧榮緒、沈約、蕭子顯、相承載筆、競志五行、雖未能盡善、而大較多實、如彪之徒、皆自以名慙漢儒、才劣班史、動遵繩墨、理絕河漢、兼以古書從略、求徵應者難、該近史尚繁、考祥符者易、洽此所以

言有乖越事不精審也。天道遼遠，裨竈焉知日蝕。不常文伯所對，至如梓慎之占星象，趙達之明風角，單颺識魏祚於黃龍，董養微晉亂於蒼烏，斯皆肇彰先覺，取驗將來。言必有中，語無虛發。苟誌諸竹帛，誰曰不然。若前事已往，後來追證，課彼虛說，成此游詞。多見其老生常談，徒煩翰墨者矣。子曰：蓋有不知而作之者。我無是也。談匪容易，駟不及舌。無爲強著一言，受嗤千載也。

藝文

伏羲已降、文籍始脩、逮於戰國、其書五車、傳之無窮、
是曰不朽、班漢定其流別、編爲藝文志、論其妄載、亦
同諸志、續漢已還、祖述不暇、夫前志已錄、而後志仍
書、何異以水濟水、誰能飲之者乎、且漢書之志、天文
藝文也、蓋欲廣列篇名、示存書體而已、文字旣少、被
閱易周、故雖乖節文、而未甚穢累、其流日廣、騁其繁
富、百倍前修、愚謂宜除此篇、必不能去、當變其體、唯
取當時撰者可耳、雖有絲麻、無棄管蒯、如宋孝王關
東風俗傳、墳籍志、庶免譏嫌矣。

人形

或以爲天文藝文雖非漢書所宜取而可廣聞見難爲刪削也對曰苟事非其限而越理來書自可觸類而長于何不錄又有要於此者今可得而言焉夫圓首方足含靈受氣吉凶形於相貌貴賤彰於骨法生人之所欲知也四肢六腑病瘵所纏苟詳其孔穴則砭灼無悞此養生之尤急且身名並列親疎自明豈可近昧形骸而遠求辰象旣天文有志何不爲人形志乎茫茫九州言語各異大漢輶軒之使譯道而通足以驗風俗之不同示皇威之廣被且事當災運尤

方言

都邑
氏族
事物

相關涉爾雅釋物、非無往例、既藝文有志、何不爲方
言志乎、但班固綴孫卿之詞、以叙刑法、探孟軻之語、
用裁食貨、五行出劉向、洪範藝文取劉歆七略、因人
成事、其目遂多、至若許負相經、揚雄方言、並當時所
重、見傳流俗、若加以二志、幸有其書、何獨捨諸、深所
未曉、歷觀衆史、諸志列名、或前略而後詳、或古無而
今有、雖遍補所闕、各自以爲工、權而論之、皆未得其
最、蓋可以爲志者、其道有三焉、一曰都邑志、二曰氏
族志、三曰方物志、何者、京邑翼翼、四方是則、千門萬

戶兆庶仰其神威虎踞龍蟠帝王表其尊極兼復土
階卑室好約者所以安人阿房未央窮奢者由其敗
國此則其惡可以誡世其善可以勸後者也且宮闕
制度朝廷軌儀前王所爲後王取則故齊府肇建誦
魏都以立宮代國初遷寫吳京而樹闕故知經始之
義卜揆之功經百王而不易無一日而可廢也至如
兩漢之都咸洛晉宋之宅金陵魏徙伊瀍齊居漳滏
隋氏二世分置兩都此並規模宏遠名號非一凡爲
國史者宜名撰都邑志列於輿服之上金石草木編

紵絲枲之流鳥獸蟲魚齒革羽毛之類或百蠻攸稅
或萬國是供夏書則編於禹貢周書則託於王會亦
有圖形九牧之鼎列狀四荒之經觀之者擅其博學
聞之者騁其多識自漢氏拓境無國不賓則有玕竹
傳節筍醬流味大宛獻其善馬條支致其巨雀爰及
魏晉迄于周隋或亦遐邇來王任土作貢異物歸於
計吏奇名顯於職方凡爲國史者宜各撰方物志列
於食貨之首帝王苗裔公侯子孫餘慶所鍾百世無
絕能言吾祖郊子見師於孔公不識其先籍談取誚

於姬后故周撰世本式辯諸宗楚置三閭實掌王族
逮乎晚葉譜學尤煩用之於官可以品藻士庶施之
於國可以甄別華夷自劉曹受命雍豫爲宅世胄相
承子孫蕃衍及永嘉東渡流寓揚越代氏南遷夷從
華夏於是中朝江右南北混淆華壤邊民虞漢相雜
隋有天下文軌大同江外山東人物殷湊其間高門
貴族非復一家郡正州都世掌其任凡爲國史者宜
各撰氏族志列於百官之下蓋自都邑已降氏族而
往實爲志者所宜先而諸史竟無其錄如休文宋籍

符瑞
釋老

文通

卷之七

記

四三

廣以符瑞伯起魏篇加之釋老徒以不急爲務曾何足云惟此數條粗加商略得失利害從可知矣庶夫後來作者擇其善而行之

或問曰子以都邑氏族方物宜各續次以志名篇夫史之有志多憑舊說苟世無其錄則闕而不編此都邑之流所以不果列志也對曰按帝王建國本無恒所作者記事亦在相時遠則漢有三輔典近則隋有東都記於南則有宋南徐州記晉官闕名於北則有洛陽伽藍記鄴都故事蓋都邑之事盡在是矣譜牒

之作盛於中古。漢有趙岐三輔決錄。晉有摯虞姓族記。江左有兩主百家譜。中原有方思殿格。蓋氏族之事盡在是矣。自沈瑩著臨海水土周處撰陽羨土風厥類衆夥。諒非一族。是以地理爲書。陸澄集而難盡。水經加注。酈元編而不窮。蓋方物之事盡在是矣。凡此諸書。代不乏作。必聚而爲志。奚事無文。譬夫涉海求魚。登山採木。至於鱗介修短。柯條巨細。蓋在擇之而已。苟爲漁人匠者。何慮山海之貧罄哉。

書事

昔荀悅有云立典有五志焉一曰達道義二曰彰法式三曰通古今四曰著功勲五曰表賢能于寶之釋五志也體國經野之言則書之用兵征伐之權則書之忠臣烈士孝子貞婦之節則書之文誥專對之辭則書之才力伎藝殊異則書之於是採二家之所議徵五志之所取蓋記言之所網羅書事之所總括也然亦未必無遺恨焉今更廣以三科用曰叙沿革曰明罪惡曰旌恠異何者禮儀用捨節文升降則書之

君臣邪僻、國家喪亂、則書之幽明、感應禍福、萌兆則書之、叅諸五志、庶幾無闕、但古作者鮮能無病、苟書而不法、則何以示後、班固之譏馬遷也、論大道則先黃老、而後六經、序游俠則退處士、而進奸雄、述貨殖則崇勢利、而羞賤貧、此其所蔽也、傅玄之貶班固也、論國體則飾朝闕、而折忠臣、叙世教則貴取容、而賤直節、述時務則謹辭章、而略事實、此其所失也、二史咸擅一家、遞相瘡痍、可謂笑他人之未工、忘已事之已拙者哉、若王況、孫盛之伍伯、起德、蔡之流、論王業

則黨悖逆而誣忠義叙國家則抑正順而褒篡奪述風俗則矜夷狄而陋華夏此必伸以純槌窮其負累雖擢髮而數庸可盡邪抑又聞之怪力亂神宜尼不語而事鬼求福墨生所信故聖人於其間若存若亡而已若吞燕卵而商生起龍瘖而周滅厲壞門以禍晉鬼謀社而亡曹江使返璧於秦皇圯橋授書於漢相此則事關軍國理涉興亡有而書之以彰靈驗可也而王隱何法盛之徒所撰晉史乃專訪州閭細事委巷瑣言聚而編之目爲鬼神傳錄其事非要其言

不經異乎三史之所書。五經之所載也。范曄博採衆書。裁成漢典。觀其所取。頗有奇工。至於方術篇及諸蠻夷傳。乃錄王喬左慈。稟君盤瓠。言唯迂誕。事多詭越。可謂美玉之瑕也。魏晉已降。語林笑林。世說俗說。皆喜載調謔。小辨。嗤鄙。異聞。頗爲無知所悅。而斯風一扇。國史多同。至如王思狂躁。起驅蠅而踐筆。畢阜沉湎。左持鰲而右杯。劉邕榜吏以膳。庖齡石戲舅而傷贅。猥雜蕪累。而歷代正史。持爲雅言。苟使讀之者。爲之解頤。聞之者爲之撫掌。固異乎記功書過彰善。

祥瑞

瘳惡者也。大抵近代史筆。叙事爲煩。推而論之。其尤甚者有四。夫祥瑞所以發揮盛德。幽贊明王。至如鳳凰來儀。嘉禾入獻。秦得若雉。魯獲如麇。求諸尚書春秋。上下數千載。其可得言者。蓋不過一二而已。近古則不然。凡祥瑞之出。非關理亂。蓋主上所惑。臣下相欺。故德彌少而祥彌多。政逾劣而瑞逾盛。是以桓靈受祉。比文景而爲豐。劉石應符。比曹馬而益倍。真僞莫分。是非無別。其煩一也。當春秋之時。諸侯力爭。各擅雄伯。經書某使來聘。某君來朝者。蓋明和好所通。

朝會

遷黜

感德所及。此皆國之大事。不可闕如。而自史漢已還。相承繼作。至於呼韓入侍。肅慎來庭。如此之流。書之可也。若乃藩王岳牧。朝會京師。必也書之本紀。則異乎春秋之義。夫臣謁其君。子覲其父。仰惟常理。非復異聞。載之簡策。一何辭費。其煩二也。乃若百職遷除。千官黜免。其可以書名本紀者。蓋惟槐鼎而已。故西京撰史。唯編丞相大夫。東觀著書。止列司徒太尉。而近世自三公已下。一命已上。苟沾厚祿。莫不備書。且一人之身。兼預數職。或加其號。而闕其位。或無其實。

名位

而有其名。贊唱爲之口勞。題署由其力倦。具之史牘。夫何足觀。其煩三也。夫人之有傳也。蓋唯書其邑里而已。其有開國承家。世祿不墜。積仁累德。良弓無改。項籍之先。世爲楚將。石建之後。廉謹相承。此則其事尤異。略書於傳可也。其失之者。則有父官令長。子秩丞郎。聲不著於一鄉。行無聞於十室。乃叙其名位。一無遺。此實家牒。非關國史。其煩四也。考茲四事。以觀今古。垂作者之規模。達哲人之準的。亦有言或可記功。或可書。而記闕其文。傳亡其事。何則。始自太上。

迄于中古其間文籍可得言焉夫以仲尼之聖也訪諸郊子始聞少皞之官叔向之賢也詢彼國僑載辨黃熊之祟或八元才子因行父而獲傳或五弑大夫假趙良而見識則知當時正史流俗所行若三墳五典八索九丘之書虞夏商周春秋禱杌之記其所缺略者多矣汲冢所述方五經而有殘馬遷所書比三傳而多別裴松補陳壽之闕謝綽拾沈約之遺言滿五車事逾三篋夫記事之體欲簡而且詳疎而不漏若煩則盡取省則都捐忘折中之宜亦何取焉

起居注

注

經籍志曰。史官記注時事。略有數等。書榻前之曆置。有時政記。載柱下之見聞。有起居注。類例則爲會要。粹編。則爲實錄。總之以待異日之采擇。非正史也。昉于蕭梁。歷世靡缺。宜夫執簡而書。盡繇撫實。借箸之筴。無不目覩。而來鵠于此。乃有三歎焉。謂宰臣密畫。史官不聞。次第周行。檢錄制奏。與冗吏同工而已。嗟乎。史者當國之龜鏡。萬載之眉目也。以彼雲譔波訪。勅編列筆。猶難勝其任。而顧令失職如此哉。

儀注
仁禮
一原
仁不
可見
而禮
可見
故聖
王治
世禮
爲大
寫

孔子之適周也。於柱下史學禮焉。歎曰。大哉。聖人之
道。洋洋乎。禮儀三百。威儀三千。而與弟子言仁也。曰。
克己以復禮。蓋宮室得其度。量鼎得其象。味得其時。
樂得其節。車得其式。鬼神得其饗。喪紀得其序。辯說
得其黨。官政得其施。凡衆之動得其宜。禮備而仁在
矣。後世禮教放失。遺經出魯淹中者。什不得一。然明
君察相。因時立制。制定而民安之。卽謂禮至今存可
也。漢興叔孫通。曹褒。雜定其儀。唐宋以來。斟酌損益。
代有不同。而適物觀時。類有救於崩敝。亦何必身及

商周揖讓登降於其間。乃爲愉快乎哉。